


DITUKÙ DYÀ BAAMAAMÙ

 . . .tabernacle, ki disambila dyànyì ndyôdi adi. Ncyà bushùwà ne ndi ne disànkà mu dindà emu, dyà kumònakù didyunda dyà mu nyumà dyà tabernacle ewu, ne mùshindu wùdìbi ne, cimanyinu cyàcya, bàdi pabwípì mpindyewu ne kwibaka èkèleeziyà mupyamùpyà. Ngeela meeji ne ki cìdi cìkèngediibwà. Pa kumòna ne paanyimà pàà . . .bu Mukalenge Yesù mwà kunènga, paanyimà pàà twètù aba bamanè kuya, nebiiikalè ne . . .nebikengelè bwà bânà bèètù balela kwikalabò ne mwaba wà kuya mu èkèleeziyà. Nènku tudi baswè “kulwangana ne mwètù mwònsò bwà Diitabuuja dyàkapàbo bansantu musangu wùm wè cyendèlèlè.” Ngeela meeji ne aci ncintu cìmpè.

² Nènku ànu pâmvwà mbwela, kùkaadi katanci apa, bwà kusàkidilakù ku majaadiki àbùngi àkaavwà mafidiibwè pa bìdi bitàngilà dyondopa, dyà mu masangisha makesè a ndekeelu aa, ku tabernacle eku. Dìbà dyònsò bìdi ànu byàmbatangana mishiki, yà dyondopa, dyondopa dinènè dyà bishimà.

³ Mwva mutùlùle mukàjàànyì pambèlu, ànu mpindyewu ewu, ne bânà ku—ku ciibi; nènku kùvwà mwanèètù wa bakàjì kampànda, mmusòmbe mwaba ewu mpindyewu, ne disànkà dìyiila ne panshì mu mùshindù wà ne ùvwa ùdila ne mwadi, bwà cishimà cinènè cìvwà cyenzèkèle mwikùlwèndè wa balùme, lwà mwàmwa, ngeela meeji, mu Chattanooga. Mándàmù Nash, mwab’ewu, mwikùlwèbè wa balùme mukesè awu ùvwa ùtàcishiibwa ne disaamà, ne disangisha dyà ndekeelu mwaba ewu, Mukalenge Yesù, ngeela meeji, e kucyèla patòòke, kwamba ne: “EMU MMÙDÌ MUKALENGÈ WAMBÀ, aci, cyàmànyì kuya. Ne yèyè neùmvwè bìmpè.” Nènku kakwètù aku kàkaadi ànu bìmpè byà menemene ne mubidi tumatuma, ne mubidi tumatuma ne mwèndè mwònsò.

Nènku bìdi—bìdi bitùpisha ne disànkà’s, paùdi umvwa majaadiki awu.

⁴ Ki pashìshe nsongàalùmè kampànda wa citende, udi pèndè kaaba aka, kulòmbayè disambila bwà Mándàmù Stotts, udi ufùma ku dipandiibwa awu. Ne disànkishiibwa dyàbò; nwamònu’s, kòkù kakùyi muntu muswè bwà twètù kumusambidila to, mòna’s wèndè . . .bìdi bileeja, bu mùdìbi ànu ne wèwè udi uteetà, pàdi bantu baswè bwà wèwè kubàsambidila, dìbà adi bòbò, disànkishiibwa, nudi numòna’s. Misangu mikwàbò bitu bilwa byà bibi be, mu mùshindù wà ne . . .kì byà bibi to, kàdi byàbùngi be, mu mùshindù wà bìkèngela ànu ùnyeemè ùye mwaba kampànda ne wòngolokè, ne ùsokomèku ndambù, bwà kwikalakù ne mwoyi. Kàdi, ndi—ndi ne disànkà

bwà mùdìbo bènza nànkù. Kanwèdikù meeji ne ncyèna muswè kubàmòna to, bwalu piikalàbo . . . bu ne kakùvwa muntu nànsha umwe muswè bwà mmusambìdìlè to, mudimu wànyì wà bwambi wùvwa mufwànyìne kwikala penyì? Nwamònu anyì? Nwamònu anyì?

⁵ Kàdi misangu mikwàbò paùdi wamba ne: “Mwanèètù Branham, ncyèna ngumvwa pàdi bantu bàbiikila mùshindù awu, kàdi—kàdi wèwè uswà kudifinda uya mwaba kampànda.” Bikèngela ngènzè nànkù bwà mpetèku mwà kwikala ne mwoyi, bwà kusambidila bantu. Kwèna ànu . . . Kí—kí mmwaba ànu wùmwèpelè, apa to. Mpa buloba bujimà. Nudi numòna anyì? Nènku—nènku’s mbyà makòyi a menemene. Nènku ndi mutwishìibwe ne nudi bumvwè aci.

⁶ Kaa, mbìmpè be bwà kwikala mwena Kilistò! Ncyèna ànu mumanyè cìndì mufwànyìne kwenza to bu kaciyi bwà Kilistò, ne pa nànkù . . . kàbidì kwikalakù muswikàkàne ne beena Kilistò, mu mùshindù wà ne, cisàmbà cyà Diitabuuja dyà mushinga mukolè dyà mwomùmwè, bàdi bìitabuuja Nzambi ne baMweyèmene; ne bìitabuuja ne dīngà ditùkù dyà butùmbi twadyàkujikijangana ne mvità yònsò eyi, ne netùpetè bucimunyi, ne netwìmanè bapikula mu difwàngana Nendè, luseke lukwàbò lwàlwa.

⁷ Nènku dībà adi ndikù muswè kufila ànu kaadimanyisha kakesè cyanàànà, ne, tabernacle wìkala mwà kulwa ewu, ne bikwàbò, ndi . . . tudi tuvwiya bulongolodi bwètù bwà mfrangà bupyabùpyà, nangàngà bwànyì mèmè bwà tùmpanyè. Kacya ànu twàbanga kwenza masangisha, kacya ànu ngàbanga wòwò aa, ku luseke lwà butangadiki, kùkaadi bidimu byàbùngì, pamutù pàà kujuula bulongolodi bwà mfranga, bwà kwikala ne kasùmbù kakwàbò kàà bantu, mvwa nkwaà mudimu ànu ne kasùmbù kànkaavwà mumanyàngàne naakù; ne kuumuka ku . . . ne ngenza bulongolodi, bwà ne masangisha àànyì ònsò ikalè ènzèka mu dinà dyà Branham Tabernacle. Ne bìvwa bipicila ku Banque Nationale de l’Union mu New Albany, kùvwàbo bafwànyìne kwikala bàfucila—bàfucila mpetu kupicila ku yèyè awu, bwà kabìkàdi byà bàfucisha bitàdi to. Bu kabìyi nànkù to, mfrangà yònsò yìvwà misangisha ayi nùnkù mbayìmfucishile bitàdi, bu ncìyi mukwàte mudimu ne Branham Tabernacle bu bulongolodi bwà mfrangà.

⁸ Bààbùngì bàà kunùdi bàkaadi bangumvwè mmanyisha cyòci aci, misangu ne misangu. Bikèngela ngènzè nànkù, bwà . . . bwà kwenza cyòci aci. Nènku pashìishe—pashìishe tudi tujuula bulongolodi bupyabùpyà bwà mfrangà mpindyewu. Ne tudi baswè bùngì bwònsò bwà bantu bàdi bamanyè ne mèmè . . . Mbanganyi bàkaadiku bumvwè mèmè mmanyisha cyòci aci ne, mafutu ònsò, ndi ngenza kupicila ku Branham Tabernacle?

Elàayi ànu byanza byènu muulu, bònsò... Bushùwà's, nwènu bònsò. Ki cyònsò cidiku.

⁹ Nènku pààjikà disangisha, nwènu baswè, ndi ne díyì dikesè kuntwaku, mu mùshindù wà ne nwènu, bu nwènu mwà kwelapù cyàlà panwìkalà nwenda nupàtuka apu. Mwanèètù Roy Roberson neikalè naaci kuntwaku.

¹⁰ Bwalu, netùjuulè bulongolodi bukwàbò bwà mfrangà, cintu cimwècimwè aci, ànu...kàdi bukwàbò bulongolodi bwà mfrangà, bwà mfrangà yònsò ne bikwàbò, yidibo bàsangisha mu masangisha ayi, bwà kabùikadi bàyifucishila bitàdi to, neyìikalè...bàdi bàyèèla, bu pa ciibidilu, ku Banque Nationale de l'Union, bwà kucyènza tupicila ku tabernacle, pamutù pàà kwikala ne—ne bulong—...bukwàbò bulongolodi bwà mfrangà. Bwalu, eci cìkaadi bulongolodi, mu dìnà dyà Branham Tabernacle, nudi numòna's. Nènku kùdi Branham *apa*, kùdi Branham *kwàka*, mùshindù ewu, nènku malongolodi mashiilàngàne abi kabyèna byènda bìmpè menemene to.

¹¹ Mwanèètù Roberson neatangilè bwalu abu, nwènu bàdi baswè abu, patùdi twenda tupàtuka apu. Netùcyànyishè.

¹² Mpindyewu, mu dindà emu, kumpàlà kwà twètù kubwela mu disangisha, ndi njinga kwamba, bu Mukalenge mwà kwanyisha ne, nënditacishè bwà kwalukila cyàkàbìdi dilòòlò edi. Ndi ngumvwa bibì bwà kunyènga Mwanèètù Neville masangisha ònsò àbìdi aa, kàdi yèyè ngudi mundòmbe ne kalolo kònsò bwà ngàakulèku cyàkàbìdi dilòòlò edi. Nènku bu Mukalenge mwà kwanyisha, ndi muswè kwakula dilòòlò edi pa cyena-bwalu cyà butangadiki, cyà ne: *Ewu Nganyi?* Nwamònu anyi? *Ewu Nganyi?*

¹³ Pa nàнку mu dindà emu, ndi muswè...mvwa ngeela meeji bwà—bwà kwakula mu dindà emu pa cyena-bwalu cyà Ditùkù Dyà Baamaamù. Ne ndi mumanyè ne mu mapingaja emu ne dindà byònsò mbyùle ne ndongamu yà Ditùkù dyà Baamaamù. Pa nàнку mèmè kwela meeji ne ndi mufwànyine mu mùshindù kampànda kusangishakù cintu kampànda, bwalu tudi baswè kusambidila babèèdi dyàkàmwè pàdi ànu disangisha edi dijika, bu pa ciibidilu.

¹⁴ Tudi twitabuuja ne Nzambì m'Mwondopi, ne Yèyè ùdi wòndopa babèèdi ne beena ntàtu. Ne mèmè ndi mumanyè ne Yèyè ùtu wènza nàнку. Ne ncyà kaciyi mpatà nànsha yà—yà kànà to, cyòci aci, bwalu kùdi majaadiki bùngì cyanààna mambàtàngàne, mu mùshindù wà ne tudi bamanyè aci.

¹⁵ Makèèlèlè awu mvwa ntàngila mu mufuku kampànda wùvwà Mwanèètù Gene ne Leo balamè, wà majaadiki àvwàbo bangùlùle. Ne cìvwa mmufuku munène mùle tètè ne majaadiki a àkèmeshà a bishimà, a dyondopa àdi Mukalenge mwenzèle bantu.

¹⁶ Ki mêmè kudyàmbidila ne, byôbi bifwànyine kwikala nànkù, kàdi bu twètù bafunde byònsò bikaadi byenzèkènzèke ebi? Ngeela meeji ne, ànu mu Puerto Rico ne mu Jamaïque, nkààyaamù, mmufwànyine kwikala mwenzèke binunu dikùmi, anyi bipite apu, byà majaadiki a àkèmesha, a dyondopa dyà Mukalenge, a bidìYe mwenzè.

Mpindyewu kumpàlà kwà twètù kubuulula Mukàndà, twànjàayi kwakula ne Mwenawù.

¹⁷ Mukalenge, tudi ne kusàkidila kwàbùngi kŪdì, mbwena kwakula ne, patùdi twinyika mitù yètù apa, tudi ànu tukukumina cyanààna tukèba mèyi a kwamba; bwalu ncyèna ngiitabuujà ne bidikù mu mishikù yà buntu to bwà kujikula njiyà yà mwoyi wà mulùme anyi wà mukàji, wà mwànà wà balùme anyi wà bakàji, bàkaadiku ànu babwelè mu dipetangana Neebè. Bwà kujikula dikuukwila dyètù, dyà mutùdi tuKukuukwila, ne mushinga wŪdì naawù kutùdi. Ncitùtápùlùle ne mpèkaatù, ne citùtápùlùle ne maalu a pa buloba. Ne cidi citùpèèsha cintu kampàndà cidi cyà Cyendèlèèlè ne cyà cibènèshìibwe. Nènkù katwèna mwà kupeta myakù bùngi bukùmbàne to.

¹⁸ Bu mwàkambàbo musangu kampàndà kùdì muntu munène kampànda wa luumù, kùkaadi ndambù wa mbingu, mu mùshindù wà ne ùvwa mwà kwakula bipeepèle myakulu mitwè ku citèemà mishìilàngàne, mu mudimu wèndè wà mufidi wa mibelu wa Mfùmù wetù wa ditùngà mulenga ewu, Dwight Eisenhower. Kàdi nànsha mùvwàye mwà kwakula, bipeepèle myakulu citèemà cijimà amu, kwambayè ne, pàakapètaye Nyumà Mwimpè, wàkatèeta yònsò citeema ayi, kàdi kakùvwakù mèyi àvwàye mwà kupeta to, cintu nànsha cimwè cìvwàye mufwànyine kujikula, ki Wèwè kumupèèsha mwakulu mupyamùpyà bwà kujikula ne kuKwela naawù twasàkidila. Ne tudi tudyùmva mùshindù awu, twètù pèètù, Mukalenge, ne, piikalà mwoyi mujikè, pàmwàpa netwàkulè mu mwakulu mushìilàngàne ànu menemene, bwà twamònakù mwà kujikula bitùdi twela meeji bwèbè Wèwè.

¹⁹ Mpindyewu tudi baswè kulòmba, Mukalenge, bwà Ùbeneshèku tabernacle ewu, mpaasàtà wèndè, balubuludi bèndè, balami bèndè, bakwàcishi bèndè bònsò, bantu bàdi bàlwa kutwèndela kaaba aka, bàbwela bàpàtuka mu biibi ebi. Swàku bwà àsanganyibwè misangu yònsò ànu ne mmwaba mulàmbula, wà diikisha ne dikùbiibwa, mùdì muzengèle mwà kubwela, kupàtuka mu biibi byàwù ne kupeta diikisha ne ditalala dyà musùukà wèndè, ne mùdì mubèèdi mufwànyine kubwela mu ciibi, ne kupàtuka mwondòpiibwe, bwà Bwikadi bùdì ne mwoyi kashidi bwà Nzambì wa Bukolè bwònsò Udi ùsòmbela mwinshì mwà musàkà wèndè ewu.

20 Tudi baswè kulòmba, Mukalenge, bwà ne mu ndongamu ulwàlwa ewu wa . . . udi munkaci mwà kwenjiibwa mpindyewu ewu, bwà Wèwè kudìsangishakù ne kasùmbù kàà balombodi ne kudìsangisha ne bònsò. Ne pìikalàbi bìKusànkisha kwikalèku civùlukilu cyà kacya ànu cyàngatangana cyà disambila dyàkenjiibwà mu cijibajiba cyà kale eci, ne kaabudimi kampàndà kàà bisoosà bibi aka, dîngà ditùkù; cidi mpindyewu cilwè kaleyi kàà bukènkè, mwaba wà ditalala ne dikùbiibwa bwà muzengèle, bwà dyandamuna dyà ku disambila adi.

21 Mpindyewu tûfwilèku luse ku cintu kanà cyònsò citùdì benzè, anyi bambè, anyi beelè meeji, civwà cibèngàngàne ne diswa Dyèbè dinène; nènku vùlukàku, Mukalenge ne, kacivwa cifùmìne mu myoyi yètù to. Tudi bafwànyine ànu kwikala bacìjikùle ku cyenzedi cyètù anyi ku mishikù yètù. Kàdi, ne lùkàsà lwònsò, Wèwè watùmvwidì cyà bushùwà. Patwámònu ne tuvwa bapilè, twasù bwà kucitonda. Ne katwèna baswè kulama mu mwoyi wètù, bubì to, díbà adi tudì bamanyè ne Nzambi kààkwàndamuna masambila ètù to; kàdi tudì tutonda bilèmà byètù ku musangu ne ku musangu.

22 Nènku tudì baswè kulòmba, Mukalenge, bwà Ûbenèshèku, mu dindà emu, bònsò mu ditùngà dijimà, bu mùdidi ditwa cyanga bwà ditùkù dyà civùlukilu cyà Ditùkù dyà Baamaamù edi. Kàdi swàku bwà edi kadìkadi ànu dyòdi edi ditùkù dyà—dyà baamaamù to; swàku bwà ditùkù dyònsò diikàle nànkù.

23 Nzambi, enzàku mu dindà emu ne, baamaamù, bakàji, bàdi balalàkàne bayè kule ne Nzambi abu, bàalukilè mu bòbò, mu dindà emu, ne bàmanyèku ne mwakù ewu *maamù* wùdi wùmvwija ne, “ewu udi mulelè.” Swàku bwà yéyè wàfika ku dyumvwa ne ndelànganyi, yà ku disangila dyèndè ne bàyèndè, ntuubwa tukesè twà mushinga mukole tunsantù tudì Nzambi mutèke mu bukùbi bwèndè. Díbà adi, Nzambi neàmwambwishè bujitu bwa dilama dyà bânà abu. Ne mùdi Mufùndù wàmba, ne: “Mukàji mwìmpè, ne maamù, cidiye aci, ncyàmubiikidilà bânà bèndè ne mmubènèshìibwe.”

24 Éyi Mukalenge, patùdi tumòna ditùkù edi, pàdìbo bàya kule menemene ne Mifùndu, ne bènza maalu ànu bu nyama! Tudi tulòmba, Nzambi, bwà Ûtùpèèshèku ditàbuluja dyà cyenakale dyàbàbiikilà bwà kwalukilabò ku mwaba wùvwàbo ne cyà kwikala adi.

25 Mukalenge, katwèna baswè, nànsha byà munyi, kupwà mwoyi bwà kuKusàkidila bwà baamaamù balelèlè to, bwalu tudì bamanyè ne tudì ne bàà nànkù biikàle ne mwoyi leelù ewu; baamaamù balelèlè, bashùwashùwàlè. Nzambi, bàbènèshèku. Bàdi mabanji manène bwètù twètù, nènku tudì tulòmba bwà Wèwè kutùngunuka ne kwikala naabò, Mukalenge, nènku swàku bwa biikalè ne nsòmbelu wa disànka ne bamòne mamuma a munda mwàbò àkwàcila Nzambi mudimu.

26 Ne tudi tulomba, Nzambi, bwà aba bàdi bavwàle cilongò cyà rose citòòke zeezeze mu dindà emu abu, anyi cilongò citòòke, bwà kwamba ne mamwàbò ùkaadi muyè dyàmwàmwà dyà cyalu cyà byenzi eci leelù ewu; swàku, Mukalenge Nzambi, biikishè mu ditalala ne midimu yàbò yibàlondè. Enzàku nàнку, Mukalenge.

27 Mpindyewu angàtáku Díyì Dyèbè, Mukalenge, wàkulèku ne cisàmba, ne ùbàpèèshèku busàmbi, bwalu ki citùdi badisangìshìle kaaba aka; mbwà kuumvwa Bwikadi Bwèbè, kuumvwa Díyì Dyèbè, ne kubèneshiibwa; ne kuumuka apa bwà kwikala balumè ne bakàji, bàna bàà balumè ne bàà bakàji batàmbe bwimpè, kutàmba patwàbwedi. Tudi tulomba nùku mu Dìna dyà Yesù, Mwànà wa Nzambi. Amen.

28 Mémè ntu munangè kubala kwà Díyì Dyèndè dibèneshiibwe. Nàнку mpindyewu netùbuululè, mu dindà emu, mu Mukàndà wà Kolintò wa Kumpàlà, ne netùbalè katùpà kàà nshapità wa 15, kubangila ku mvnsà 1.

Kàbìdì, bàna bèètù, ndi nnwàmbila ne èvànjeelìyò wúngààkanùyìishà, unùdì kàbìdì nwènù baakìdìle, ne munùdì nwènù biimàne awu,

kunùdì kàbìdì nwènù basùngidìibwe, panwikalà nwènù balamè mu civùlukilu ne mémè ngwààkanùyìishà, amba ànu ne nwènù nwàkiitabuujà mu cijèngù.

Bwalu kumpàlà kwà byònsò ngààkanwàmbila bìndì mémè pàányì mupetè, mwàkafwà Kilistò bwà mpèkaatù yètù bilondèshìle mifùndu;

Ne yèyè wàkajìkìibwa, ne wàkabùka ku lufù mu ditùkù diisàtù bilondèshìle mifùndu;

29 Wèwè udi mufwànyìne kwamba ne: “Mwanèètù Branham, awu’s mmufùndù wà pabwàwù bwà diyìishà dyà Ditùkù dyà Baamaamù.” Èè, aci ncyà bushùwà. Kàdi, nudi bamanyè’s, Nzambi ùtu wa pabwèndè, ne Ùtu wènza bintu mu mùshindù wà pabwàwù.

30 Nèku ndi ngeela meeji ne, meeji, a maamù. Ne mémè ndi nendè mu dindà emu, ku ngàsà wa Nzambi, mucikàle ànu neetù pa buloba apa. Ne ndi ne kusàkidila bwà mààmù. Kàdi bu mùvwàbi bitùkèngela kàbìdì, ne, twìkalè ne mudimu wà dyondopa, kàdi ncìyi mumanyè ne nèngàalukilè cyàkàbìdì dilòòlò edi to, kàdi mvwa mudyàmbidile ne pàmwàpa tuvwa bafwànyìne kuzòla cimfwànyì cyà mùshindù mukwàbò.

31 Maamù mmulenga wa dikèma. Nudi bamanyè’s, wa kumpàlà udi ukwakidila, mu mwoyi ewu, mmamwèbè. Muntu nànsha umwe kèna mwà kukulengakù to, bwalu wèwè wàkiimiciibwa, ne yèyè ngudi ukwambula kwinshì kwà mwoyi wèndè. Ne yèyè ngudi wa kumpàlà wa dikumanya, ne wa kumpàlà, mu nsòmbelu emu, wa—wa dikukwàta. Dìbà adi, paùdì ulediibwa, yèyè ngudi

cimwè cyà ku byanza byà kumpàlà bìdì bìkulenga ne bìkukùpula binsónji ku mèsù. Yèyè ki wa kumpàla wa kukutuuta cyanza ne kukunanga, ne kukutènda, mu nsòmbelu webè, mmamwèbè. Mpindyewu, ndi ngeela meeji ne kakwènakù buneemè búngì bukùmbàne butùdì mwà kupà maamù to.

³² Maamù ngudi wa kumpàla wa kwikala pàmwè ne mwànà, ne yèyè ngudi mwambùle bujità bunène pa ciikalà mwànà, neciikalè bilondèshile mùdì maamù ùbanga ne mwànà awu mu kajila kiikalàye ne cyà kwendela. Maamù ngudi mwambùle bujita abu, bwà kùdì Nzambi, bwà kutèeka mwànà awu mu njila mujaalàme. Nènku ndi ngeela meeji ne ki bwà cinyi baamaamù bàtu ne kaadilenga kakesè kàà pabwàkù.

³³ Ndikù mumanyè mwabilaayi kampànda mu cimenga emu. Ngeela meeji ne mamwèndè ùdì kaaba aka mpindyewu. Ùdì wàmba kwikala wa bukolè bwànyì ebu. Kàdi ncyèna ngamba bwalu ebu bwà kutàpa maamù awu ku mwoyi to; bwalu yèyè ùkaadi mupetèpète mpùtà yàbúngì, ànu mùdì baamaamù bònso bayipetèpète amu. Kàdi nsongàalùmè awu ùtu ùnwa maalà, ùtòkolà ne nzàbà. Ne pàdiye ùkwàcika bikolè, ùdì wàlukila kwàbò kumbèlu ùkadyèla mu bulàalù mùdì mamwèndè kàdi kushàala muupùkile mamwèndè. Pèndè's ùkaadi ne biikùlù. Kàdi kùtu cintu kampànda mu kutuuta kwà cyanza kwà maamù, cidi cyùmvwika bu ne cidi cyàngata kaaba ka—kashiilàngàne ne mùdì cintu kampànda cikwàbò kanà cyònsò eci mwà kulenga; mbwèna kwamba ne, mu nsòmbelu emu, mu ngaakwilù wa buntu.

³⁴ Nudi bamanyè's, muntu bu Mòsà, yèyè. . . Mèmè mufwànyine kutwà cintu kanà cyònsò makùmbù bwà ngiikàdilù wèndè, mbwalu ùvwa ne maamù mutùma kùdì Nzambi. S'nudi bamanyè ne ùvwa nyèyè wàkasambila, Yoshèbèdà awu, ne wàkajinga bikolè mwinè mwànà awu. Nènku pàakalediibwàye, yèyè nguvwa umutènda, ne kumukòngoloja ne kumwibakila kalàalù ne kumutèeka mu nkodì, pàvwà mwoyi wèndè mukwàte ne byà luse awu wùcibuluka. Mwanèndè umwèpelè wa mu dibòko, ne yèyè nguvwa kaacintu kakesè kàà—kàà katàmbe bulenga kàvwàku pa buloba bujimà. Ne mùshindù mwinè wùtù maamù ùnanga mwànà wa mu dibòko kanà yònsò ewu's we! Kàdi pa kumòna mwànà mukèsè wa pabwèndè ewu!

³⁵ Ne pashiishe, mu mwoyi wèndè amu, ùvwa mumanyè ne mwànà awu ùvwa mulediibwe bwà kiipàcilà kampànda, ne pashiishe kumwangata ne kumutèeka mu cisòmbedi mene cyà ngandù, mu musùlù mwàmwa. Ku diitabuuja nkwàkenzàye cyòci aci, mumanyè ne Nzambi ùvwa ne bukolè bwà kumukùba; ne bwà kwamba mu cikòsò dinanga dyà maamù, ne cyenzedi cyà ngiikàdilù wa diitabuuja dyèndè. Bwalu diitabuuja kaditu diditèeka pa nsenga yà yinyungakanangana yà cididi mwà kumòna to; kakùyì tuseku to diitabuuja ditu dishindameena

pa lubwebwe lùdi kalùyi mwà kunyungishiibwa lwà Díyi dyà Cyendèlèlèlè dyà Nzambi. “Bwalu ku diitabuuja,” mùdi Mufùndù wàmba, “nkwàkenzàye cyòci eci.”

³⁶ Nènku diitabuuja dùtu mwà kwimanyina pa lubwebwe, mu mùshindù wà mavwala àtuuta ku nshindameenu aku, kàdi kutàngila buludi mumpàlà mwà lufù ne kumanya ne lwòlò nelwikalèku ànu mu katanci kakesè, kàdi diitabuuja didi mwà kutàngila dyàmwàmwà dyà mbú kùdi Ewu wákamba ne: “Mémè ndi dibìikà dyà ku lufù ne Mwoyi,” ne kupanga mene ne kuumvwa mùdi mavwala àpaasalala amu.

³⁷ Ki diitabuuja dyà mùshindù awu divwà naadi mamwèndè wa Mòsà. Wàkamulongesha ne wàkamukoleshila mu nzùbu wa bukalenge wà Pàlò, ùmulongesha ne wàkalediibwa bwà kiipàcilà kampànda, ne Yèhowàh wàkandamuna ku disambila dyèndè. Nènku, yéyè...yéyè kàvwa mufwànyine kwikala mupetè mulongeshi mutàmbe bwìmpè to. Ki cìvwà cìkwàcisha ncyaci bwà kufwimba ngiikàdilù uvwa Mòsà awu.

³⁸ Ngeela meeji ne ùvwa ng’Abraham Lincoln wákamba díyi bu nùnkù ne . . .

³⁹ Kàdi, mémè ncyèna nì n’Démocrate nì n’Républicain to, ndi ànu . . . Ndi mwena Kilistò. Bwalu, ngeela meeji ne luseke lùmwe kí ndufwànyineku kwamba bubì bwà lukwàbò luseke to; byònsò ndibola. Kàdi, Abraham Lincoln, ku àànyi meeji mémè, ùvwa umwe wa ku . . . ùvwa umwe wa ku Bamfùmù bàà ditungà bàà batàmbe bunène bàkaadiku États-Unis ewu mupetè; tubadilamù ne Washington, ne bakwàbò.

⁴⁰ Bwalu, Abraham Lincoln ùvwa ne—ne mbangilu mubi. Ùvwa mupèlè. Kàvwa ne nshindameenu nànsha umwe, bwà tulaasà tulonga, anyi—anyi cintu kampànda cyà cinène, anyi mfrangà, anyi cintu kampànda cìvwà cìfwànyineku kwikala cimukwàcishe, bu mùvwà naabi Washington to. Washington ùvwa licencié wa mu cilongelu citùmbùke, ne—ne ùvwa mumanye; ùvwa muntu wa meeji matwè, muntu munène, ànu kwìnè kwònsò aku. Kàdi Lincoln ùvwa mukolèle mu kazùbù kakesè kàà mici, mu buloba bunène bwà Kentucky, mu kazùbù kakesè kàà kale kakàyi keela nshàamendè panshi to, kàdi kashàale bu civùlukilu mùneemu mu Louisville mpindyewu aku. Kàdi, mwikàle muntu munène uvwayè awu, ne byàkamukèngela kuyiila mwà kufùnda panshi mu malaba pàvwàye udimba, bwà kukùna matalà apu.

⁴¹ Kàdi ndi mwà kwambila bansongà eci. Nutukù bamanyè ne Abraham Lincoln kacya kàvwakù ne mukànda bu wèndè mu nsòmbelu wèndè, too ne paanyimà pàà mumanè kupeta bidimu makùmi àbìdi ne cimwè, ànu Bible ne mukànda wa bafwile diitabuuja wà Fox anyi? Nwamònu’s, cyùdi ubala ncidi cìfwimba ngiikàdilù ùdi nendè awu. Kabyèna bikèmesha to patùdi ne musumbà wà bantu banyùngùlùke mitù leelù ewu;

tuubikàndàkàndà twà kale twà maalu mafwikakaja, ne maalu a ciipanshì ne a lukutukutu, ki bidìbo bàtèeka pa bitanda byètù byà disùmbishila bibèjibeji. Yèyè ùvwa ne Bible ne mukàndà wà Fox wà bafwile diitabuuja. Tàngilàayi nùmonè cyàkamuvwijàci!

42 Kàdi mu biinè byònsò abi, dǐngà ditùkù yèyè kwamba dǐyi bu nùнку ewu. Yèyè ne: “Bu kwòkò cintu cǐmpè mu mèmè, mbwà maamù wa difwànà dyà Nzambi,” wàkamukolesha bwà kukwàcilayè Mukalenge mudimu’s.

43 Nudi numòna’s, mwànà ùtu ùtèelejila mamwëndè; dimulenga dikesè kampàndà dyà kùdi maamù awu, didì mwànà awu muswè kutèeleja. Pàdiye ùtápika ku mwoyi, ùyaaya kùdi maamù bwà kupeta busàmbi kumpàlà kwà kuyayè kùdi taatù. Bwalu, maamù nguvwa nendè kumpàlà, nudi bamanyè’s. Ne kùdi dipà kampàndà didì Nzambi ùpèèsha maamù, bwà kwikalayè mùshindù awu; ndi nswà kwamba maamù mulelèlè. Mpindyewu, mèmè ndi ngiitabuuja ne baamaamù mbàà kuneemekiiibwa ne bàà difwànà dyà Nzambi.

44 Kàdi ndi ngeela meei ne, bu mùdi Matùkù a Baamaamù, bu mùdi edi nùнку, ncintu cilongolola, bwà kubweja mfrangà búngì cyanàànà ku bilòngò ne bikwàbò. Kàdi bivwa bikèngela bwà ditùkù dyà baamaamù kwikaladi ditùkù dyònsò dǐcyacyà dǐiliilè edi. Kabǐyi kumutùmina cisùmbù cyà bilòngò mu Ditùkù dyà Baamaamù adi to, kàdi kumunanga ne kumutàbaleela matùkù nkàmà yisàtù ne makùmi àsambòmbò ne àtaanu a muunya ne bufùku, munda mwà cidimu cijimà. Kàdi, mu bushùwà bwà bwalu, bangèndààmùshìngà bàdi bàkwàtangana bikolè mu bintu byà nùнку, kàdi cidi—cidi—cidi cipeepeja maamù.

“Kaa, èè, Ditùkù dyà Baamaamù dyà musangu mushààle’s mvwa mumutùmine cisùmbù cyà bilòngò.”

45 Yèyè mmufwànyine kutàmba kwanyisha, bikolè menemene, wèwè musòmbèlekù ànu panshì ne muyiikilàngànekù nendè ndambù, mumufùndilekù tulongo, mumutuutèkù cyanza pa dikaaya, mumutwèku mishikù pa ditàma, mumwambìlekù mùdi mumunangè. Neciikalè ne mushinga mukolè kutàmba bilòngò byònsò byùdi mufwànyine kusùmba kwà musùmbishi wa bilòngò abi. Ncyà bushùwà’s.

46 Ngeela meei ne mùvwa mmu Mikenji Dikùmi, yà Cecil DeMille ufwile ewu, uvwa mufunde ne mwelè pa mukàbà wà bindidimbì wùmwè wà ku midimu myowela-byanza yà nsendèmà yà pa buloba. Ne kumpàlà kwà kuleejiibwaci ku bantu, anyi kwà kucipàtulayè, Cecil DeMille wàkabiiikila Oral Roberts ne Demos Shakarian, ne musùmbà wa bambi bàà Èvànjeelìyò mu Kaabujimà, ne wàkabàbweja mu studios yèndè sungasunga ne wàkaleeja mèbà anaayi a Mikenji Dikùmi, ne kubàkonkayè wabò mmwènenenu pa cyòci aci. Nzambi ikishishèku musùkà wèndè wà bukitù awu!

47 Nènkù pàngààkawùmònà, pámwà ngùbandila, kùwà kaabwalu kakesè kàvwà kashàale misangu yònsò ànu kandamàte. Piikalàbi ne bààbúngì bàà kunùdi bààkawùmòna, cìwà ndìbà divwà mwànà wa bakàjì wa Pàlò... paanyimà pàà Mòsà mumanè kusangana ne yèyè ùwà mwena—mwena Ebèlù, nènkù yèyè kwàngàta dipàngadika dyà kuya kasòmbela pàmwè ne cisàmbà cyèndè. Nènkù ki mamwèndè wàwa uvwakù musangu kampànda mulenga kumòna awu musòmbe, mufwatàlale yònsò, ne mvyà ne minyèngù kwísu, musòmbe mu nkwasà wa mabòkò; ànu mùtù maamù amu. Ki mwànà wa bakàjì wa Pàlò kubwelayè. Ki yèyè ne: “Mémè ndi mwànà wa nganyi’s, twamb’eku twamb’eku?”

48 Nènkù pààkatòkeshiibwàbi ne, Yoshèbèdà ki uvwa mamwèndè mulelèlè. Mwànà wa bakàjì wa Pàlò awu, ne bilaabu byèndè ne bikwabo, ne byònsò bimana kulongolola; kwambayè ne: “Kàdi, tàngilà! Yèyè ùdi mwà kwikala mwanèbèè wa balùme, kàdi,” yèyè ne, “mémè ngudi mumupèeshe mabanji ne bulenga. Ciwúvwàku wèwè ewu mwà kwikala mumupèeshe cìwà ànu biinà byà bitoci.”

49 Kàdi maamù mukùlákàjì wa mvyà ku mutù awu kwambayè ne: “Kàdi mémè’s ngudi mumupè mwoyi.” Aci’s ki cìdi cyèenza dishiilangana. “Mémè ndi mumupè mwoyi.” Nzambi wàkamupà Mwoyi wà Cyèndèlèlè. Mùshindù mwinè wùdi maamù mulelèlè’s, maamù!

50 Misangu mikwàbò bantu bàtu bàngambila, nangànangà misangu yàbúngì mu tùmpanyè twànyì ne, mémè ntu “nyiisha díbà dyònsò ànu pa dibìikà dyà ku lufù.” Nènkù ndi mubalè mufundu mu dindà emu, nshapítà wa 15 ku mvensà mwi4 wa Kolintò wa Kumpàla, pa dibìikà dyà ku lufù.

51 Kàdi, nudi numòna’s, mùshindù wùdìbò bóbò bàtèeka maamù leelù ewu, nkanyingù kàà bilòngò katèeka ku luseke lwà inàbànza mukùlákàjì, mwikàle mukùlákàjì wa kàyikù mwà kujuuka kuulu to, pàmwàpa, ne butekètè, ne mvyà ku mutù, ne minyèngù, musòmbe mu nkwasà wa mabòkò. Aci cidikù cyà bushùwà. Kàdi ndi muswè kwàngàta cyena-bwalu cyànyì ne kunùzòlelakù cimfwànyì cishiilàngàne cyà cìdi maamù.

52 Muntu kampànda ùwà wàmba ne: “Wèwè udi utàmba kuyiisha pa dibìikà dyà ku lufù be. Mukenji pàmwè ne wònsò’s wùdi ne cintu kampànda cyà cìtàngilà dibìikà dyà ku lufù.”

53 Mòna’s, cyà bushùwà’s. S’ki—s’ki mwaba mutàmbe bunènè wà ciikishilu wà Èvànjeeliyo. CyàkenzàYe nànsha ciikàle cinyì, bu ne Yèyè kààkabiika ku bafwè to, díbà adi byònsò abi’s bivwa cyanàànà. Cìdi, bwànyì mémè, cijaadika ne Yèyè ùwà Nzambi. Cìdi cijaadika díyì dyònsò dyàkambàYe; dibìikà dyà ku lufù! Ne cìdi kàbìdi mwaba wà ciikishilu wà musùukà. Ki mwaba wà mbilangilu. Ki dyoya dyà busàmbi bwètù.

54 Nènku patùdi twètù tumòna ne Yèyè wàkabiika ku bafwè, cìdi citùshikika, ne byà mvità byà Èvànjeeliyò, ku mwalu wà mvità, bwà kwangata kaaba, bwà kulwangana mvità. Bwalu, tudi bamanyè ne Yèyè mmwambè ne: “Ewu wajimija mwoyi wèndè bwà bwalu Bwànyi neàwùpetè cyàkàbìdì.”

55 Nènku mèmè ndi ngeela meeji ne ki dyashiibwa dinènè dyà cifulu dyà Èvànjeeliyò mu Kaabujimà, dibìikà dyà ku lufù adi, ne milayi yàdi yà Nzambi, ne busàmbì bùdidi difila kùdi aba bàdi bàdyèyemenà. Bwalu, didi dilaya disangila dinènè dyà didisanga dyètù cyàkàbìdì. Didi dilaya, ne di—dijìmina dyà mpèkaatù yònsò. Didi dilaya dijìmina dyà dikònyangajiibwa dyònsò, makènga ónsò atùdi bapetèpète mu ewu, mwàkakèngelàbi bwà twètù kupicila, mu mwoyi wà pànu ewu. Didi dilaya, ne dijìmina dyà byònsò abi. Didi dilaya ne nànsha lufù mene nelùjimijè bukolè bwàlù bwà dikwàta, ne netùjuukè mu difwàngana ne Yesù. Nènku, ku wanyi mmwènenù, dibìikà dyà ku lufù ki mulayi wà mutàmbe bunènè wà ku milayi yònsò mu bintu byà mu Mifundu. Pòpò apu ki pàakacitwilàdi citampì.

56 Nènku Paasàkà washàadi ewu, pàmvwà nyiisha pa bintu bitaanu byà ne:

Mu kwikala ne mwoyi, Yèyè wàkannanga; mu kufwà, Yèyè wàkansungila;
Mu kujiikiibwa, Yèyè wàkangata mpèkaatù yànyi e kuya kayishiya kule;
Kàdi, mu kubiika kwà ku lufù, Yèyè wàkambingisha cyànàànà bwà kashidi.

57 Ki Ditùkù ndyòdi adi bwànyi mèmè, Ditùkù dinènè dyà ku matùkù's! Ne pa kumòna mushinga wikalàci naawù, bwètù twètù bònsò, mu dibìikà dyà ku lufù, patùdi tutàta ne midimu mikolè ne bindile Ditùkù dibènèshiibwe dyà ku matùkù adi apa!

58 Didi ditùpèesha mulayi wà ne dīngà ditùkù baamaamù bakùlakàji, bàdi bènda bàteketa, bàà butekète, bàà mvya ku mitù, bacibùlùke aba nebàshintuludibwè. Kì ng'ānu ne maamù neikalè musòmbe mwaba awu, nkàayèndè to, kàdi nnè dīkù dyèndè dijimà pāmwe nendè.

59 Nènku nditùkù kaayi diikalàci's wè! Ncikondo kaayi ciikalàci, pàtwatàngilà pa mpàlà yà aba batùvwà banangè bilenga byà dikèma abu's wè! Dishiihangana kaayi mu dyòdi dinda adi, patwàmòna bananga beètù, ne—ne kubandila ciikalàbo dībà adi's wè! Ntātù yònsò neyùmushiibwè. Bimanyinu byònsò byà lutātù nebyùmushiibwè. Kakwàkwikala kàbìdì byà matàmà matòokoloja kùdi lufù to. Kakwàkwikala kàbìdì binsònji bipātuka mu mèsù to. Dibìikà dyà ku lufù didi dilaya byònsò ebi. Kakwàkwikala kàbìdì madilu to. Kakwàkwikala kàbìdì dituuta dyà mwànà wa pambidi tuumapi ku ditàmà to, udi mushàale bu dibwe awu; udi mulongolodi wa bitàlù mumanè kwela manga a dibènga-kubola, ne mwelè lupeepèlè ne mulaabè

mùkubù, ne bikwàbò, bwà kumwèkabi bu ne mbyà mu bufùki. Katwàkwikala kàbìdì naabi dijinga to, kwòkò aku.

⁶⁰ Nènku ndi ngeela meeji patwàbàmònà biimàne kuntwaku, bananga bèètù abu, baamamwètù, beena cifuku cyètù, balundà bèètù bònso; ne kubàmòna mu mibidi yàbò yìdì kayiyi yìfwa ayi, mibidi yàbò yà mu dyulu ayi; tubandila ngiikàdìlù wabò, tumòna mwikalàbò bàditwàla ne kalolo kààbò ne ditùùjà dyàbò adi, kakùciyi kàbìdì dibìnduluka anyi maalù matondè to. Pa kubàmòna dìbà adi biimàne mu difwànangana ne Mukalenge Yesù, s'neciikalè ditùkù dilenga dyà dikèma.

⁶¹ Ne yònsò wa kutùdì, mu meeji ètù, myoyi yètù yizùka ne yìjinga dìbà dyà busàmbi adi, patwàtwilanganà naabò apu. Muntu ne muntu ùdi wèla meeji ku munanga wendè, pàmwàpa mamwëndè ukàadi mufwè awu. Kàdi nditùkù kaayi diikalàci, pawàmumònà cyàkàbìdì's wè! Ne papa, ne mwanèètù, ne... bananga bònso abu, nditùkù kaayipu's wè!

⁶² Ndi pàanyi ngeela meeji, mpindyewu mene. Ndi ngeela meeji ku fàmiyè wanyi, mushinga wikalàci naawù mu Ditùkù adi.

⁶³ Ndi ngeela meeji ne, mu dindà dyà dibìikà dyà ku lufù adi, pàmwàpa wa kumpalà wàlwa kutwilangana naanyi neikalè Sharon wanyi mutekète awu. To, yèyè kààkwikalakù ùzakala to. Démon awu kèna mwà kubwela mu awu mwaba to. Nshìngù wa kabaala nànsha wa kànà kènàku mwà kulenga Buloba abu to. Kààkunkùpakù cyanza cyà dindaya naaci to. Mésù makesè a bleu awu, neikalè àja maja pòololàye mabòkò wèla lubilà lukolè ne: "Papa!" Nèngiikalè ne disànkà dyà kumumòna, pa kumanya ne yèyè kàadyàkufwàku kàbìdì to; pa kumanya ne byònsò mbijikè, ki bwà cinyi ndi nyiisha dibìikà dyà ku lufù bikolè nunku.

⁶⁴ Pashìshe nèmmonè mamwëndè, mamwëndè wa Billy, mwanàanyi wa balùme ewu. Ne ndi ne bivùlukilu búngi cyanàana kwòkò aku mene bicidì bishààle mu mèmè emu. Ndi muvùlùke pàmvwà nya nendè; anyi Mukalenge Combs, mwab'ewu, ùya nendè bwà lwendu lwèndè lwà ndekeelu, ne mèmè mvwa ngenda mmulonda, mu kàshinyi. Patùvwà twenda tupweka ne Mùsèèsù wa Mwandamutekète apu, mwómò amu mene; Billy, ùvwa ne ngondo dikùmì ne mwandamukùlù.

⁶⁵ Mùvwàbò bàpàtuka bàya nendè mu mùsèèsù, ne bàshiyà mamwëndè ùmutàngila. Nènku ùvwa ùshààla mulàadile panshì ùdila mwadi, ne ùtàngila mwanèndè wa mu dibòko awu, kàdi kàyi mwà kuseemena pabwìpì nendè to.

⁶⁶ Ki pashìshe mu dipweka ne njila amu, mulongolodi wa bitàlù kulwa e kupweka ne—ne Mùsèèsù wà—wà Mwandamutekète awu. Maman wanyi ewu nguvwa umutàngila mu cyòci cikondo aci. Nènku mwànà ùvwa mwimàne pambèlu mu bulà, muvwàle kaamùpanù kakesè menemene kípì, ne kafulu kakesè kakünze kasendemija pa luseke ku mutù aku. Nènku

pàvwà maamù awu, mulàadika pa kalààlù kàà dibùnya aku, mu ndekeelu mwà màshinyi a cyambula-babèedi aci amu, muntàngile, pàakamònaye mwanèndè wa mu dibòko awu mwimàne mu bulà, bu mùvwàye mumanyè ne ki lwendu lwèndè lwà ndekeelu lùvwàye wènza, wàkajuuka pa kalààlù aku ne wàkeela lubilà lukolè, ne wàkakùpa cyanza cyèndè cikaavwà cishààle ànu mifùbà aci, bwà kuupukila mwanèndè awu mu bulà amu. Kàdi kàvwa mwà kumwangata to.

⁶⁷ Kaa, neciikalè disànkà dyà kumumòna mu ditùkù adi. To, kààkwikala ne byanza bishààle mifùbà, anyi ne matàma mondòke to. Kàdi neimanè mu bulenga bwà mu Dyulu bwà mukalenge-mukàji wa mu Dyulu, ne bwà maamù. Mèsù èndè mafike awu, mafike bu a mapwapwà a nyunyi wa cikòlòlò, miikàle àja ne disànkà. Kààkwikala mukòbàme yònsò to; bwalu, démon wa disaamà dyà cyàdi awu kàadyàkubwelakù mu Buloba abu nànsha. Kàdi, kàyi ùfwa, yèyè neimanè mu difwànangana Nèndè.

⁶⁸ Ndi ncinka ne, pashiishe, wâlwa mulondèle bwà kutwilangana naanyi neikalè Edward, utùvwà tubiikila ne “Humpy” awu, dìnà dyà cikòsò. Yèyè nguvwa wa kumpàla wa ku mùyòdòlòlò munènè wà manungu citèemà, mùyòdòlòlò wà dìkù dyà ba-Branham awu. Yèyè nguvwa dinungu dyà kumpàlà dyà kukòseka; divwà dindondèle mèmè. Nèmmònè Edward ùlwa lubilu kùndi. Nànsha mwàkafwàye nsongaàlùmè, ne bidimu dikùmi ne citèemà, amu. Kàdi pàngiikalà mumukwàte ku cyanza, ndi mutwishiiibwe ne netwikalè ne maalu àbùngi be a dyambilangana, a ku bwànà, bwalu tuvwa baanyànà. Tuvwa balamàkàne. Ùvwa ùnshiila mvwàla nkooçi wèndè, ne—ne—ne bikwàbò, mùvwà bânà bàà muntu balelèlè bènza amu. Neciikalè disànkà bwà kumumònakù cyàkàbìdi.

⁶⁹ Nènku nèmmuumvwèku wàmba cintu kampàndà cyà mùshindù ewu ne: “Ùvwa mupetè mukenji wànyì anyi, Bill? Ùvwa wènza mudimu mu ferme wa ngombe, mu cikondo cyànyì cyà dishiyangana ne buloba aci. Kàdi mu lùpitaadi, mèmè kutùma mukenji ne: ‘Ambilaayi Bill ne maalu ònsò àdi bìmpè.’”

Nèngiikalè ne disànkà dyà kwamba ne: “Èyo, mvwa mupetè mukenji wèbè, mu mpàtà mwàmwa.”

⁷⁰ Pashiishe, ndi ncinka ne, wàlonda wâlwa neikalè papa wanyì. Yèyè ki uvwa dinungu dyàkalondà bwà kuya, ne . . . To.

⁷¹ Ngeela meeji ne Charles nguvwa dinungu dyàkalondà, mwakunyaànyì wa balùme awu. Wàkapetakana ne njiwù yà màshinyi pàciwàye ànu mwànà mutekète. Ùvwa wènda ùkòka mukòlò wèndè wà dyàbalùme, pàvwàye wènda. Kàdi, nudi bamanyè’s, pàngaàmumònà, kààkwikala ùkòka mukòlò wèndè awu to. Byònsò nebiikalè bijikè, neimanè mu bulenga bwà bunsongaàlùmè.

⁷² Nènku neàngambilè, cintu cyà mùshindù ewu, mwikàle ùfúkisha mimwemwe. Neámbe ne: “Èyowà, Bill, apa kakwèna njiwù to. Ne ndi mvùluka dilòlò divwà didiyànjiile dímvwà mupetèke ne njiwù yà màshinyi ayi ne, wèwè uvwa wakula naanyi, mwimànyine mu mushikù wà mbèlù wà kazùbù kèètù kakesè kàà didipwekesha aku,” ne mèmè ndi mutàngile musàkà wàkù, mpindyewu mene. “Wèwè kwakula naanyi bwà Mukalenge, ànu mèbà makesè cyanààna kumpàlà kwà mèmè kuya. Ne uvwa mu cyambilu munkaci mwà kuyiisha pàngààkumukà.”

⁷³ Pashiishe papa ngwâlwa. Kaa, s’ndi mwà kumumòna’s. Nànsha mùvwàye ùngeela minyànzu mikolè búngiyi amu, yivwà yinkèngelà ànu menemene, kàdi nèmmonè cikùtù cyà nsuki mifiikè myenzè mabùulàmabùulà ayi, yibàlakana mùshindù wà kacya, mu diine ditùkù adi. Nènku yèyè neàntàngilè, ne neámbe ne: “Mwanàanyi, udi mumanyè’s, Papa kàadyakujuukakù kàbidì ku mèèsà eku, mwikàle ne nzala to, bwà kushiila bànà bèndè bàdya, bwalu’s apa tudi naabi búngi cyanààna. Kakwènakù lukèngelu lwà bintu apa to.”

⁷⁴ Kumumòna pàvwàye wènza mudimu, ciinè aci bwà tuumeeyà makùmi àtaanu anyi makùmi mwandamutekètè ne tùtaanu ku ditùkù, ne pashiishe kujuuka ku mèèsà bwà bànà kudyàbo, wàlukila cyàkàbidì ku mudimu. Byà bwalu ùvwa ùkwàta mudimu mukolè mu mùshindù wà ne mutèèlù wèndè wùvwa wùmulamata pa mwongo ne mabuba a muunyà, ne mààmù ùwùkòsa ne lùshoolè.

⁷⁵ Nèmmuumvwè wàmba cintu kampàndà bu ne: “Bill, udi muvùlùke dilòlò dinwàkalwà wèwè ne Mwanèètù George bwà kunsambidila pàmvwà ngenda nya adi anyi? Udi mumanyè’s, ngákambila maman ne kùvwa Banjèlò bàbidì batòòkè biimàne ku bulààlù aku, ne mwanjèlo mukùnze kwìnshì kwà bulààlù. Nènku mwanjèlo mukùnze awu ùvwa ùteeta bwà kungangata, kàdi Mwanjèlo mutòòke kwimanayè pankaci apu. Ndekeelu wa byònsò bòbò kuyabò naanyi Kumbèlu.”

⁷⁶ Pashiishe, kàbidì, wàkalòndela mu dinungu bwà kuya, anyi wákaya, Howard ngwâlwa. Nèmmonè Howard; mutùvwà twenda bu baanyàna mu ditùngà dijimà, myaba yònsò; mubiikidiibwe bwà kwikala mwambi; ne buumùntù bulenga be, kàdi baanyàanèndè mbàvwà bàmupangisha. Muiyiki wà ndekeelu wùngààkenzàku nèndè, yèyè wàkamba ne: “Pàngààyà, Bill. . .”

⁷⁷ Mèmè—mèmè kumumòna ùya, mu cikèènà—kumòna, bidimu bu bìnaayi nànkù kumpàlà kwà kufwàye. Mèmè kumwambila ne mvwa mumòne Papa ùtèeka cimanyinu pa lukitá lwèndè wàmba ne yèyè nguvwa ulondà.

⁷⁸ Ki yèyè ne: “Kùdi cintu cimwèpelè cìndi njinga bwà ùngenzèlèku.” Yèyè ne: “Mèmè ntu musopàkàne mu nsòmbelu

wanyì. Ntu musèlàngàne ne bikwàbò byònsò. Ncyéna—ncyéna mumanyè cìdì cyenzèke to.”

Mèmè ne: “Udi muMwitàbùùje anyì, Howard?”

⁷⁹ Yèyè ne: “Ne byònsò bìdì munda mwànyì, ndi muMwitàbùùje.” Munda mwà matùkù àbìdì anyì àsàtù kumpàlà kwà kuyayè, wakadishiya mu ditalala ne Nzambi, ne Mwanèètù Neville ne bakwàbò abu kuntwaku. Ki kwambayè ne: “Kùdì cintu cìmwèpelè cìndì njinga bwà ùngenzèlèku. Pàngààyà, Bill, ùbàmbilè bàngimbilèku ne: *Yèyè Neùmvwè, Nè Neámbe Nè: “Udi Mwenzè Bìmpè.”*”

⁸⁰ Ngeela meeji ne, kumpàlà kwà mèmè kulabula Howard ku cyanza, nèmmuumvwè wimana ùntàngila, wamba ne: “Bill, Yèyè’s wàkumvwa.”

⁸¹ Paanyimà pàà aci, nekùlwe Mwanèètù Seward, Mwanèètù Frank Broy, Mwanèètù George DeArk. Kaa, dibìikà dyà ku lufù’s dìdì ne mushinga wàbùngì be bwànyì mèmè. Ndi ne mwoyi wùzùkila dìbà dyà butùmbì dyà dyoya adi. Ne pààbangà Bukènkè kutangalaka: “Netùmanyè mutùdì bamanyìibwe.” Netùmwè, ne—ne netùvulukè batùvwà bamanyàngàne naabò ne—ne aba bàvwàku abu.

⁸² Ne—ne bààbùngì, nekùwikalè bààbùngì kuntwaku batùvwà katùyì nànsha twelela meeji ne bàvwa mwà kwikalaku to. Bwalu, nudi bamanyè’s, pa dìbà adi, mpàndì ngiitabuujà ne “dyàmpà ditùdì biimànshèmànshè mu bantu, bu pa màyi mavwandùlùke adi, nedìtwàlùkidilè mu Ditùkù adi.” Patwàmònà bipeta byà bujaadiki bwètù, pa bantu batùvwà katùyìkù tuumvwa cyenzèdì cyàbò kùdìCi, pàmwàpa nebìikalèmu. Ditùkù kaayi dìikalàci’s wè!

⁸³ Ne pashiishe, kàbìdì, mamiinu atùvwà bakùnekùne, katùyìkù nànsha beelè meeji cìvwàwu mafwànyìne kwenza to, kàdì’s ki òwò aa. Mmakwàme mamuma a mushinga mukolè, ne netùàmònè mu Ditùkù adi, bananga bèètù ne bilongo byà mutù mukolè abi.

⁸⁴ Ne ndi ngeela meeji ku binunu bìnkaadi mumòne bikùdimùne mucimà, èyòwà’s, too ne mu miliyò mpindyewu, byènda bìya, ne cìvwà mudimu wàbò wà bwambi. Kaa, nebikengelè kutàmba ne dibìishiibwa dyà ku lufù mene. Nebikengelè Cyendèlèlèlè, bwà kwendakana, kulabulanganakù ku cyanza ne kujandula bintu bìndì ncìyi mumanyè mpindyewu to.

⁸⁵ Nekùwikalè baamaamù bakùlàkàjì bàà mvyà ku mutù, banùdì bavwàdìle bilòngò bitòòke leelù ewu abu, bàànùmònà, ne nebìikalè balenga bàà dikèma. Kabàyi baleejìibwe kùdì dibùngù dyà bilòngò, anyì fòtò kampànda wa muntu mukùlàkàjì wa mvyà ku mutù nànsha; kàdì mu difwànangana ne bulenga bwà dibìikà dyà ku lufù, nebìimanè mu difwànangana ne Kilistò,

mibidi yàbò yà mu Dyulu ayi, bansongà ne balenga bwà kashidi. Cyà bushùwà, ki diikisha ndyadi. Ki Ditùkù dyà baamaamu dîndì mêmè mwindile ndyôdi adi. Ki dyashiibwa dyà cifulu cyà butùmbi ndyôdi adi. Kaciyi cilengejilu cyasa pa kàzakù to, kàdi dyashiibwa dyà cifulu cyà butùmbi dyà musùùkà, bwalu Nzambi mmumushintùlùle!

⁸⁶ Ndi ngeela meeji ku mààmù wanyì mêmè sungasunga, mukùlàkàje ne butekète, ùzakalala ne tunèkè twà tuzakaja. Kààkwikala wènza aci mu Dìtùkù adi to. Dìbà adi nebìikalè bishiilàngàne. Ne Bukênkè bunène abu bùdi bùbanga kutangalaka, patùdi tubanga kukènzakana apu, ne cijèngù cinène aci neciikalè cyènda cidyunda ànu kudyunda. Byònsò bidi ànu munkaci mwà kuleeja diseemena dyà Yesù. “Ne paanyimà pàà katanci,” mùdi musambu mwambè, “ne nèmmonè Yesù ku ndekeelu.”

Yèyè neikalè mungindile, Yesù, wa musàngeeleu wà menemene ne mulelèlà.

Pa Nkwasa Wendè wa butùmbi mulenga awu

Yèyè neàngaakidilè Kumbèlu

Paanyimà pàà ditùkù edi dimanè kujika.

⁸⁷ Dìbà adi patùdi tuMumòna apu, ne katwàkwikala mutùdi mpindyewu emu to. Netù—netùmanyè mwà kutàmba kuMunanga. Katwàkushààla biimànyine kwàka ne kandambù kàà bwòwà to; bwalu, netwikalè bafwànàngane Nendè. Èè, Yèyè neàtambè kwikala cilongo cyètù kutàmba mùdiYe mpindyewu emu. Netùtambè kuMuumvwa bìmpè. Bwalu, tudi kule kwà dikèma, mu mibidi yà cifwàkà; dìbà adi netwikalè ne mubidi mufwànàngane ne mubidi Wèndè wà butùmbi awu. Netùmanyè mwà kuMukuukwila. Ne patùdi tumòna cidi Bwikadi bwà buuKampànda Bwèndè butwènzèle, butùshintùlùle, bakùlàkàji baalùkile ku busongà, dikònyangala dyònsò dilongòlòdiibwe, kaa, s’netùmvwè dìbà adi bwà cinyi bukolè Bwèndè mbutwòndòpe.

⁸⁸ Nkonko yidi mu meeji ètù yà ne: “Yèyè ùdi mwà kucyènza bishi? *Cikampànda* ncifwànyine kwenzeka bishi?” Nànsha nànkù, mu mùshindù wà kawùyi wùmvwika to, nebìjiminè byònsò. Majità àdi maswika paanyimà pàà meeji ètù ne: “Neciikalè cikampànda anyi? Ncifwànyine kwikala munyi?” Mu mùshindù kampànda, anyi kansanga, minu yà yikèmesha ayi neyìikalè ànu mwà kusùùlula, kukùtululula majità awu, ne byònsò abi nebìjiminanganè mu cifulu cyà butùmbi cimwèpelè cinène cyà dinanga.

⁸⁹ Dìbà adi netùMumòne. Dìbà adi netwikalè bafwànàngane Nendè. Dìbà adi netùMukuukwilè. Dìbà adi netùmonè maamù mùdi Nzambi muswè bwà kwikalayè amu.

Maamù kí mmufwànyine kwikala mukùmbànàngane Mwómò amu kàyi ne dikù dyèndè to.

⁹⁰ Bwalu, cikondo cyà citàmbe bunènè cyà ku matùkù èndè ònsò a mwoyi ncyà kumòna bânà banyùngùlùkile mèèsà, ne bwònsò bwàbò biikàle ne mubidi tumatuma ne disànka; ne—ne—ne kumumòna ùpòngolola kàfé, anyi cyònsò cìdiye wènza aci, ne ùlongolola didyà dyà dilòlò, ne yéyè ne papa bàsòmba. Mòna's, aci's ki cikondo cyà citàmbe kwikala cyà disànka mu nsòmbelu wa maman, pa kumòna bânà bèndè bònsò kumbèlu.

⁹¹ Mpindyewu, kanùpangiki to, kanùpangikikù Ditùkù adi to. Enzàayi bwà munyòlòlò munènè wà dîkù dyènù awu wùswikakanè, dinungu ne dinungu dyònsò. Enzàayi bwà lusambu ne lusambu lwònsò lwikalè mu njântà. Dìbà adi patwàsòmbà pàmwè ne mèkù ètù ne tusùmbù twètù, dyàmwàmwà dyà bipòoyi byà Cyendèlèlè, Ditùkù kaayi diikalàci's wè! Dìbà adi netùmvwè.

⁹² Yéyè ngwàkalaya cyòci eci, mu Bwàkabuulwibwà 1, mwaba wùdiYe mwambè, ne: “Mwelè wà mvità musàkisha nseke yibìdì wùvwa wùpàtuka mukana Mwèndè.” “Ûvwa ùbiikidiibwa ne Diyì dyà Nzambi.” Ne kùvwa nku mishikù yimwèyimwè ayi, yàkambà ne: “Ndi Ewu udi ne mwoyi, uvwa mufwè; ne Ndi ne mwoyi bwà kashidi ne kashidi.” Ku mishikù yimwèyimwè ayi, mu Yone Munsantu 6, makùmi àsàtù ne. . . ùdi wàmba nùku, ne: “Ncyàkujimijakù cintu nànsha cimwè to, kàdi nèncijualè cyàkàbìdì ku matùkù a ndekeelu.” Ûvwa n'Yéyè wàkenza mulayi awu; mishikù yimwèyimwè yà musinga mukolè ayi. N'Yéyè Udi utùsùngila, Udi utwòndopa, Udi mutùpikùle, ne Wàtùbìisha ku lufù ku ditùkù dyà ndekeelu.

⁹³ Piikalàbi ne wèwè ki dinungu dikesè ditekètè didi ditàpùlùle nsangilu wa dîkù dinène edi mu Ditùkù adi, Nzambi wa mu Dyulu awu, mu dindà emu, mu mùshindù kampàndà wà kawùyì wùmvwika to, àkutululèku tuumajità tokesè tùdì tùswika mu meeji èbè atu, ne àkubuulwilèku dinanga didiYe naadi bwèbè wèwè, ne wèwè ùlwekù ne kalolo kònsò bwà kuMukwàcila mudimu.

Patùdì twelangana meeji ku bintu ebi apa, tùsambilàayi.

⁹⁴ Kumpàla kwà twètù kusambila, ne panùdì ne mitù yènù miinyika apu, nèngiikalè mwà kunùkònkakù. Nudikù baswè, mu Ditùkù dyà Baamaamù edi, kulàmbula cyàkàbìdì nsòmbelu yènù kùdiYe, bindìle ne nujinga dibìikà dyà ku lufù adi anyi? Nudikù mwà kwela byanzà byènù muulu kùdiYe anyi? Pàdì muntu ne muntu. . . Nzambi ànùbènèshè.

⁹⁵ Nkufwànyinekù kwikala ngènzàmpèkààtù kampànda udipù mpindyewu, mufwànyinekù kwamba ne: “Éyi Nzambi, kacya ncitukù mwanji kudipàyika mu dinungu adi to. Mèmè ki dinungu didi dipangike didi difwànyine kupanga kwikalakù pàabàngà mààmù kukèba eku ne eku mu Butùmbì mwònsò amu. Mèmè ncyàkwikalakù to, bwalu kacya ncitukù mwanji kukèba ditalala ne Nzambi to. Ncyèna ne ditèkemena dyà Mwoyi

wà Cyendèlèlè munda mwànyì to. Kàdi leelù ewu ndi—ndi muswè kwenza nànkù”? Udikù mwà kwela cyanza muulu anyì, bwà kwamba ne: “Nsambidilèku, Mwanèètu Branham, pa dība edi. Ndi muswè bwà ùmvùlùkèku mu disambila, bwalu ndi ne bananga dyàmwàmwà dyà mbù, mbù wa Mwoyi awu, ne ndi muswè kutwilangana naabò”? Elàayi byanza byènù muulu.

⁹⁶ Anyì muntu kampànda udi mutwè cìmpìngà, ne muswè bwà kwalukila mu ditùkù edi, bwà kwamba ne: “Mukalenge, nyewù ndilàmbula cyàkàbìdì Kùdì; ndi ndwa bwà kwenzulula cipungidi cyànyì Neebè,” nudikù baswè kwela byanza byènù muulu anyì?

⁹⁷ Taatù wetù wa mu Dyulu, pàdì ditùkù edi dyènda didikòka apa, dyòdì neditùsemèjè ne ditùkù òmwè ne bwalu bunènè bwikalà mwà kwenzeka abu. Ne twètù nyewù tudi benzèjìbwe ku bukolè, cidimu ne cidimu cyònsò eci, bwà kumòna mùdì eci cìleejìbwa.

⁹⁸ Kale wàwa pàvwà bantu bàya ku Yelusàlèmà mu Ditùkù dyà Mpenta, ne bwà dikezudiibwa dyà ntentà wa kusambakeena ne dyà mwaba wa cijila, ne—ne bwà dilàmbula dyà mulàmbù wa mpèkaatù, ku cidimu cyònsò bàvwa bàbàvùlwija, pàvwà mwànà wa mùkòòkò awu ùfwa kuntwaku apu ne, kùvwa mwà kulwa cikondo cìvwà Mwànà wa mùkòòkò wà Nzambi mwà kufwà, bwà kwipata mpèkaatù. Musangu wònsò wùvwà kalumyànà aku kàdila, ne mashi àbasàmpukila pa byanza, cìvwà cibàvùlwija ne kùvwa mwà kwikala cikondo cìvwà Mwànà wa Mukòòkò wà Nzambi, uvwa mwà kwela lubilà ne: “Eli, lama . . . ? Eli, lama . . . ?” ku nkùrusè.

Nyewù ndòmba, Nzambi, ne patùdì twètù tutàngila leelù ewu ne tumòna ne . . .

⁹⁹ Kùkaadi ndambù wa mbingu, kumpalà kwà kuumuka mu mudimu Wèbè, bwà kuya mu Californie, mu Indiana emu mùvwà mutupù ne mufwè, ne kamùvwà mwoyi nànsha mukesè to, bwà pa kutàngila. Bilòngò bìvwà bifwè mu movù mushààle wà mabèjì àpòpoka awu. Mabèjì àvwa mapòòpòke ku micì. Ne màyi a mu micì àvwa mayè mu miji, ne byònsò bìvwà bifwè.

¹⁰⁰ Kadi kùvwa movù kampànda pàvwà dībà dibangè kuteema mu mùshindù mushiilàngàne. Dībà òmwèòmwè òvwà diteemè mu movù mujimà wà mashika awu, kàdi bintu bìvwa bishintùlùke ne dyòdì kuteema mùshindù mushiilàngàne. Nènku ku diteema dyà dībà adi, ne bintu abi, mwoyi kusampila, myaba yònsò. Mabèjì kupingàna ku micì. Dibèjì . . . Mwoyi wùvwà muumùke mu dibèjì, ne dibèjì dimatè, kàdi mwoyi muyè mu buloba; mmwalùkile mu bulenga bupyabùpyà, pa bulenga bwà bunsongà. Cìlòngò cìvwà cilekèlè mànànanshì àcì—àcì aci, cìvwà cilekèlè bulenga bwàcì bwà disànkà dyàbùngì ne cipòne ciyè mu buloba aci; ncilediibwe, cibwayike cyàkàbìdì mu bunsongà bwàcì, ne mànànanshì mapyamàpyà.

Cidi citùvùlwija cinyi, Mukalenge, mu mēbà aa?

¹⁰¹ Nēnku buloba mboomūke ku cipèèlà cyà munda mutupù, cyà cidila mwadi, bulwè mpàladiizò wa bulenga, ne mbùlùbùlù ne nyuunyi yimba misambu, ne byònsò ne disànka mu mwoyi, ne micì yì—yisàngala mu mpeepèlè yà kapeepà kàà muvù wà luuyà wà bintu bitòloka. Luuyà ne disànka bivwa cyàkàbìdi pa buloba, bifùmina ku dībà, d-î-b-à.

¹⁰² Kàdi dīngà ditùkù M-w-â-n-à neâlwe ne dyondopa mu mapwâpwâ Èndè, ne myoyi yà mikesè yìdi misokoka bu mâyi a mu mucì, mu buloba ayi, bu mwo—mwoyi wùdi mu dimiinu dyà cilóngò, newùcifikishè cyàkàbìdi ku bupyabùpyà, kaciyikù mwà kufubidila to. Kaa, mùshindù mwinè wutùdi tuKwela twasàkidila bwà ciinè eci's wè!

¹⁰³ Nēnku nyewù kùvwa byanza byàbùngì be byela muulu mu dindà emu, bwalu mbamanyè ne dyàmwàmwà dyà cilàmbà cikùdika, kùdi cintu kampànda. Bàdi bàjinga kumòna maamù. Bàdi bàjinga kumòna bananga bààbò ne bamanyangana naabò, ne kujandula maalu-masokoka ônsò aa, mùdìbo bàlwa pànwapa, too ne mu bikondo byònsò. Byònsò abi bìdi bisanganyibwa paanyimà pàà cilàmbà cikùdika cisokoka. Nēnku dīngà ditùkù Wèwè neâlwe. Nēnku bōbō mbeelè byanza muulu; mba—mba—mba—mbaswè kwikala batwìshìbwè, Mukalenge. Bàdi munkaci mwà kudìvwijulula bapyabàpyà, ne mēmè pàànyì. Mpinyewu tükwàcishèku, Mukalenge. Vwìjùlùlaku diitabuuja dyètù dipyadìpyà ne dikànda dyètù.

¹⁰⁴ Ne bu mutùdi tuumvwa diseemena dyà Mukalenge. Ne bidimu makùmi ànaayi byàshàadi ebi, kwàkapàtuka mpenta mupyamùpyà pa buloba. Nyumà wàkabanga kusokolola maalu. Nēnku's ki twètù aba ku cimanyinu cyà ndekeelu, pabwìpi menemene ne Dilwa. Tudi bamanyè ne diseemena dyà Mukalenge dikaadi pabwìpi. Ne tudi tumòna babèèdi munkaci mwà kwondopiibwa ku māsaaàmà àbò, civwà kaciyikù cyùmvwika to bwà bàà pa buloba, munda mwà bidimu binunu bìbìdi, kacya ku bàpostòlò. Kadi's ki cyòci eci cimwènèka cyàkàbìdi, bapròfetà bàjuuka, Banjelo bàmwènèka, bimanyinu ne maalu a kukèma. Ncinyi aci? Dibiishìibwa dyà ku lufù didi dyènda diseemena. M-w-â-n-à ùlwalwa.

¹⁰⁵ Enzàku bwà twikalè badìlongòlòle, Mukalenge. Enzàku bwà twàkidilè mulayi wònsò wà Nzambi; katwèna twela meeji bwà tuumajità tùdìbo bakùngwije kùdi maalu a mamanya etu, ne bikwàbò ne, kacyèna mwà kwenzeka to. Enzàku bwà twòtò atu túbangè kukùtuluka, mu dindà emu, ku bàdi kabàyi bàfwa . . . [Katùpà kàà mukàbà wà mèyi munda mutupù—Muf.] . . . pàdiYe ùtùtukila ku Méyi a Bible wa Nzambi apa, cyenzè bu cyamù cyà mudimu cijaalamija bìmpè, bwà kwimba cyonà cyà ne: “Ndi Ewu uvwa mufwè, ne udi ne mwoyi kashidi ne kashidi.” “Katanci kakesè, bàà pa buloba

kabààkuMmòna kàbidì to; kàdi nwênù nenùMmòne.” “Bwalu Nêngiikalè neenù, munda mwênù mene, too ne ku nshìikidilu kwà buloba.” “Ne nebyènzekè mu matùkù a ndekeelu, mùdì Nzambì wàmba, ne Mémè nêngiìcikijè Nyumà Wanyì pa musunya wònsò; bimanyinu ne maalu a kukèma; bakùlumpè nebàlootè bilòotà, ne nsongàalùmè neyimonè bikèenà-kumòna,” cimanyinu cyà mvùlà mushiishe ne cyà cikondo cyà nshìikidilu. Enzàku bwà cyùmvwikè munkaci mwètù, mu dindà emu, Mukalenge, ne swàku bwà diitabuuja dyètù dikubiibwè. Bwalu tudi tulòmba nùnkù mu Dîna dyà Yesù. Amen.



DITÜKÜ DYÀ BAAMAAMÜ LUA59-0510M

(Mother's Day)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Ditükü dyà Baamaamü, mu dyàlumingu mu dindä, mu matükü 10 a ngondo mwitänü, cidimu cyà 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mëyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org